

CONVENIO DE COLABORACIÓN ENTRE A VICEPRESIDENCIA PRIMEIRA E CONSELLERÍA DE PRESIDENCIA, XUSTIZA E TURISMO E A CONFEDERACIÓN GALEGA DE PERSOAS CON DISCAPACIDADE (COGAMI) PARA A ADQUISICIÓN DUN VEHÍCULO ADAPTADO

REUNIDOS

Dunha parte.- Alfonso Rueda Valenzuela, vicepresidente primeiro e conselleiro de Presidencia, Xustiza e Turismo, actuando en nome e representación da Xunta de Galicia, en virtude do Decreto 112/2020, do 6 de setembro, polo que se nomean os titulares das vicepresidencias e consellerías da Xunta de Galicia, -no exercicio das facultades que lle confire o artigo 34 da Lei 1/1983, do 22 de febreiro, reguladora da Xunta e da súa presidencia.

Doutra parte.- Anxo Antón Queiruga Vila en calidade de Presidente da Confederación Galega de Persoas con Discapacidade – (COGAMI), con número de CIF: G- 32.115.941, declarada de utilidade pública por Orde do Ministerio do Interior do 17 de maio de 2004

Ámbalas dúas partes recoñécense con capacidade legal suficiente para outorgar o presente convenio.

EXPOÑEN

Primeiro. – De conformidade co artigo 1 do Decreto 233/2012, do 5 de decembro, a Vicepresidencia da Xunta de Galicia configúrase coma un órgano superior de coordinación da Presidencia da Xunta de Galicia ao que lle corresponden, entre outras, as funcións de coordinación e planificación interdepartamental e a súa execución.

Pola súa parte, a tenor do Decreto 74/2018, do 5 de xullo, polo que se establece a estrutura orgánica da Vicepresidencia e da Consellería de Presidencia, Administracións Públicas e Xustiza, en relación co Decreto 130/2020, do 17 de setembro, polo que se fixa a estrutura orgánica das vicepresidencias e das consellerías da Xunta de Galicia, correspóndello a esta Consellería contribuir á cohesión territorial e a equilibrar as disparidades no desenvolvemento socioeconómico de Galicia, mitigando os desequilibrios entre o medio rural e urbano, o interior



e a costa e contribuíndo á fixación de poboación, mediante a redución de diverxencias. Neste sentido, a existencia de asociacións que poidan levar a cabo actividades de interese xeral para os municipios non sería posible sen a axuda e colaboración da Administración Pública. A maior abastanza, e dado o carácter limitado dos recursos municipais, a única maneira de diminuír as diverxencias territoriais e a través de axudas desde a Administración Autonómica.

Tendo en conta os principios inspiradores das relacións entre Administracións Públicas, aínda que a colaboración interadministrativa non se dea de forma directa entre a Comunidade Autónoma e o Concello, a concesión da axuda a COGAMI repercute positivamente na poboación municipal e por conseguinte na actividade ordinaria dos Concellos. Queda patente por tanto que, a colaboración na prestación de servizos á poboación que reside no ámbito rural a través de Asociacións constitúe unha competencia da Dirección Xeral de Administración Local, cuxo contido económico se xestiona desde a Secretaría Xeral Técnica Consellería de Presidencia, Xustiza e Turismo.

Polo exposto correspóndelle á citada Secretaría Xeral Técnica asumir a concesión da axuda, en tanto en canto constitúe o órgano de apoio e asistencia das diferentes Direccións Xerais.

Segundo.- A Constitución Española establece no seu artigo 9.2 que corresponde aos poderes públicos promover as condicións para que a liberdade e a igualdade dos individuos sexan efectivas.

O Real Decreto lexislativo 1/2013, do 29 de novembro, polo que se aproba o Texto refundido da Lei xeral de dereitos das persoas con discapacidade e a súa inclusión social establece no seu artigo 22 que as persoas con discapacidade teñen dereito a vivir de forma independente e a participar plenamente en todos os aspectos da vida. Para iso, os poderes públicos adoptarán as medidas pertinentes para asegurar a accesibilidade universal, en igualdade de condicións coas demais persoas, nas contornas, procesos, bens, produtos e servizos, o transporte a información e as comunicacións, incluídos os sistemas e as tecnoloxías da información e as comunicacións, así como os medios de comunicación social e noutros servizos e instalacións abertos ao público ou de uso público, tanto en zonas urbanas como rurais.

Ademais, o principio de transversalidade das políticas en materia de discapacidade sinala que as actuacións que desenvolvan as administracións públicas comprenden as políticas e liñas de acción de carácter xeral en calquera dos ámbitos de actuación pública, onde se terán en conta as necesidades e demandas das persoas con discapacidade.



Terceiro.- A Vicepresidencia primeira e Consellería de Presidencia, Xustiza e Turismo no exercicio das súas competencias está a desenvolver diferentes programas e accións encamiñadas a lograr o efectivo achegamento da Administración aos cidadáns, contribuíndo á cohesión territorial e ao equilibrio das disparidades no desenvolvemento socioeconómico de Galicia. Entre outras actuacións colabora para solucionar situacións sociais problemáticas, ben directamente ou cooperando con institucións que traballan a nivel local co afán de prestar un maior servizo á veciñanza.

Cuarto.- COGAMI ten entre as súas funcións a de conseguir a plena inclusión das persoas con discapacidade en todos os ámbitos da sociedade, a través da defensa e promoción dos seus dereitos, da reivindicación do cambio social, da potenciación do asociacionismo e da prestación de servizos que satisfagan as súas necesidades e expectativas.

COGAMI pon de manifesto que dende o ano 2018 está a levar a cabo un proxecto innovador para a promoción da autonomía persoal mediante un plan integral de actuacións sobre as persoas con discapacidade en situación de dependencia desde a idade temperá, no edificio CEGADI (Centro Galego de Discapacidade) situado en Santiago de Compostela. No marco deste proxecto vanse a desenvolver un conxunto de intervencións desde unha perspectiva centrada na persoa, coa finalidade de que a persoa con discapacidade en situación de dependencia beneficiaria do mesmo, desenvolva as habilidades e capacidades necesarias para poder ter unha vida autónoma.

Para o axeitado desenvolvemento deste programa COGAMI atópase co problema da dispersión da poboación galega, que motiva a dificultade que teñen os menores que viven na contorna rural galega para poder acceder a servizos especializados que permitan mellorar a súa autonomía persoal e social.

A alta dispersión xeográfica, o elevado número de núcleos de poboación e a falla de accesibilidade do transporte público en Galicia condiciona que os menores con discapacidade que viven no rural galego poidan acceder a servizos especializados como fisioterapia, logopedia, terapia ocupacional, neuropsicoloxía, psicoloxía, etc en igualdade de condicións que os menores que viven nas contornas urbanas.

Para asegurar que non exista discriminación no acceso a estes servizos por mor do lugar de residencia, COGAMI solicita a colaboración da Vicepresidencia primeira e Consellería de Presidencia, Xustiza e Turismo para a adquisición dun vehículo adaptado que lles permita



desenvolver un servizo de transporte para o acceso ao servizo dos usuarios que residen nos núcleos rurais.

Quinto.- Ao abeiro do exposto, esta Vicepresidencia primeira e consellería da Presidencia, Xustiza e Turismo considera necesario colaborar con COGAMI para a adquisición dun vehículo adaptado que lles permita desenvolver un servizo de transporte para facilitar o acceso aos servizos que forman parte do plan integral de actuacións sobre as persoas con discapacidade en situación de dependencia desde a idade temperá aos usuarios que residen nos núcleos rurais.

Sexto.- As actuacións obxecto deste convenio, recollidas na súa cláusula primeira, e as específicas necesidades inherentes ao colectivo ao que van dirixidas, considéranse razóns que acreditan o seu interese social e, polo tanto, non é posible promover a concorrência pública, conforme ao previsto no artigo 19.4 c) da Lei 9/2007, do 13 de xuño, de subvencións de Galicia.

Sétimo.- A entidade cumpre cos requisitos para obter a condición de beneficiario da subvención de acordo ao disposto no artigo 10 da Lei 9/2007, do 13 de xuño, de subvencións de Galicia.

En consecuencia, ambas as dúas partes acordan subscribir o presente convenio de colaboración con suxeición ás seguintes

CLÁUSULAS

PRIMEIRA.- Obxecto

O presente convenio ten por obxecto fixar as liñas de colaboración entre a Vicepresidencia primeira e Consellería de Presidencia, Xustiza e Turismo e a Confederación Galega de Persoas con Discapacidade para a adquisición dun vehículo adaptado que lles permita a COGAMI desenvolver un servizo de transporte para facilitar o acceso aos usuarios que residen nos núcleos rurais aos servizos que forman parte do plan integral de actuacións sobre as persoas con discapacidade en situación de dependencia desde a idade temperá.

SEGUNDA.- Obrigas das partes

Obrigas da Vicepresidencia primeira e consellería de Presidencia, Xustiza e Turismo



A Vicepresidencia primeira e Consellería de Presidencia, Xustiza e Turismo, cooperará na execución do proxecto ao que se refire a cláusula primeira deste convenio de colaboración, mediante a achega de catorce mil cento cincuenta e nove euros con trinta e nove céntimos (14.159,39 €) , con cargo á aplicación orzamentaria 2020.05.21.121A.781.0 (código de proxecto 2015 00121) dos orzamentos xerais da Comunidade Autónoma para o ano 2020.

Esta cantidade representa o 32,06 % do orzamento total do proxecto que constitúe o obxecto deste convenio.

Obrigas de COGAMI

Ademais das establecidas con carácter xeral na Lei 9/2007, do 13 de xuño, de subvencións de Galicia e na súa normativa de desenvolvemento, son obrigas do beneficiario:

1. Destinar os fondos percibidos ao financiamento das actuacións recollidas na cláusula primeira do presente convenio.
2. Proceder ao reintegro, total ou parcial, das cantidades percibidas, se as houbese, xunto cos xuros de demora correspondentes, segundo o procedemento establecido no artigo 38 da Lei de subvencións de Galicia, nos seguintes supostos:
 - a) Incumprimento das condicións establecidas para a concesión da subvención e para a correcta execución e xustificación do proxecto subvencionado.
 - b) No suposto de que a entidade beneficiaria non xustifique a efectividade dos pagamentos no prazo e na forma establecidos na cláusula terceira deste convenio.
 - c) Nos suposto de que se produza exceso das subvencións percibidas de distintas entidades públicas respecto do custo do proxecto ou actividade, nos termos do artigo 23 do Decreto 11/2009, do 8 de xaneiro.
 - d) Incumprimento das obrigas establecidas no artigo 11 e 15 da Lei 9/2007, do 13 de xuño, de subvencións de Galicia.
 - e) Nos demais supostos de aplicación, nomeadamente os establecidos no artigo 33 da Lei 9/2007, do 13 de xuño.
3. Destinar os bens ao fin concreto para o que se concede a subvención durante un período mínimo de cinco anos, procedendo ao reintegro das cantidades percibidas no caso de incumprimento desta obriga. A axuda só será definitiva se non sofre antes de transcorridos cinco anos do seu remate unha modificación que afecte á natureza do investimento.



4. No seu caso, solicitar os tres orzamentos que se esixen en aplicación do artigo 29.3.º da Lei 9/2007, do 13 de xuño, de subvencións de Galicia.

5. Consentir expresamente a inclusión dos datos relevantes deste convenio nos rexistros públicos que proceda, conforme coa disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, dos orzamentos xerais da comunidade autónoma para o exercicio 2006 e artigo 16 da Lei 9/2007, do 13 de xuño, de subvencións de Galicia.

6. Prestar a colaboración e facilitar canta documentación lle sexa requirida, no exercicio das funcións de control que lle corresponden á Intervención Xeral da Comunidade Autónoma, ao Consello de Contas e ao Tribunal de Contas, así como o sometemento ás actuacións de supervisión e control previstas na Lei 9/2007, do 13 de xuño, de subvencións de Galicia, así como as xerais derivadas da aplicación da normativa de axudas e subvencións.

TERCEIRA.- Xustificación e libramento dos fondos

A achega económica da Vicepresidencia e Consellería de Presidencia, Administracións Públicas e Xustiza realizarase nos termos requiridos nos artigos 28 e 29 da Lei 9/2007, de 13 de xuño, de subvencións de Galicia e no Decreto 11/2009 do 8 de xaneiro, polo que se aproba o Regulamento da Lei 9/2007 citada.

A xustificación final da realización das actividades subvencionadas e da consecución dos obxectivos previstos revestirá a modalidade de conta xustificativa con entrega de xustificantes de gasto, de conformidade co establecido nos artigos 28 da Lei 9/2007 e 48 do Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia.

A persoa representante de COGAMI acreditará a realización das actividades financiadas estendendo certificación do cumprimento da finalidade para a que foi concedida a axuda.

Os gastos acreditaranse mediante facturas e demais documentos de valor probatorio equivalente con validez no tráfico xurídico mercantil ou con eficacia administrativa, nos termos establecidos regulamentariamente.

Con anterioridade á xustificación da execución da actividade presentarase unha declaración do conxunto das axudas solicitadas, tanto das aprobadas ou concedidas como das pendentes de



resolución, para un mesmo proxecto das distintas Administracións Públicas competentes ou das súas entidades vinculadas ou dependentes.

Á vista desta documentación, o órgano competente da Consellería expedirá certificación acreditativa do cumprimento dos fins obxecto do convenio.

Cando as actuacións obxecto do convenio fosen financiadas, ademais de coa subvención, con fondos propios ou outras subvencións ou recursos, deberá acreditarse na xustificación o importe, a procedencia e a aplicación de tales fondos ás actividades subvencionadas, de conformidade co establecido no artigo 28.6 da Lei 9/2007, de 13 de xuño, de subvencións de Galicia.

Ao abeiro deste convenio poderán financiarse os gastos nos que tivese incorrido a asociación, como consecuencia da realización de actuacións acordes co obxecto do convenio e que se teñan efectuado con anterioridade á sinatura do mesmo, sempre que se trate de gastos correspondentes ao actual exercicio económico.

O prazo para presentar a documentación xustificativa da subvención será dende a formalización do convenio ata o 16 de decembro de 2020.

CUARTA.- Compatibilidade con outras axudas

De acordo co disposto no artigo 40.1º, letra d) Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, de subvencións de Galicia, a achega económica prevista no presente instrumento será compatible con outras subvencións, ingresos ou recursos para a mesma finalidade, procedentes de calquera Administración ou entes públicos ou privados, nacionais, da Unión Europea ou de organismos internacionais

QUINTA.- Seguimento do convenio

Para facilitar o seguimento e cumprimento do convenio, constituirase unha comisión mixta paritaria, integrada pola Secretaria Xeral Técnica da Consellería e a Presidenta da Asociación, ou persoas que designen no seu nome, e un representante máis de cada unha das partes.

A comisión mixta ditará as súas propias normas de funcionamento, debéndose reunir cando o solicita algunha das partes.



As súas funcións serán:

- Interpretación do convenio
- Proposta, se é o caso, de addendas
- Intervención previa á resolución por incumprimento
- Coordinación das funcións das dúas administracións
- Calquera outras relacionadas co desenvolvemento deste convenio

SEXTA.- Causas de resolución

O presente convenio extinguirase polo cumprimento das actuacións que constitúen o seu obxecto ou por incorrer en causa de resolución.

O presente convenio resolverase:

- a) Por incumprimento total ou parcial dalgunha das estipulacións que o regulan.
- b) Polo transcurso do tempo estipulado sen que se culminen as actividades obxecto da axuda.

De resolverse o convenio, a Vicepresidencia primeira e Consellería de Presidencia, Xustiza e Turismo poderá, no seu caso, esixir o reintegro das cantidades achegadas. Igualmente, de conformidade có disposto no artigo 17.3 da Lei 9/2007, do 13 de xuño, procederá o reintegro do exceso percibido no suposto de que o importe da axuda, illada ou en concorrencia con outras subvencións ou axudas, ingresos ou recursos, supere o custo da actividade subvencionada.

SÉTIMA.- Publicidade

O presente convenio será obxecto de publicidade e inscrición de conformidade co disposto na Lei 1/2016, do 18 de transparencia e bo goberno da Administración pública galega. Así mesmo, incluírase no Rexistro Público de Axudas, Subvencións e Convenios, de conformidade co Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de orzamentos xerais da Comunidade Autónoma de Galicia para o ano 2006.



As partes asinantes consenten na publicidade dos seus datos persoais e demais especificacións incluídas no presente convenio de colaboración no Portal da Transparencia e Goberno Aberto.

De conformidade coa Lei 38/2003, do 17 de novembro, xeral de subvencións, o presente convenio e a información sobre a subvención serán comunicados á Base de datos nacional de subvencións (BDNS).

OITAVA.- Vixencia do convenio.

O presente convenio entrará en vigor o día da súa sinatura, e estará en vigor ata o 31 de decembro do ano 2020.

NOVENA.- Natureza do convenio e normativa aplicable

O presente convenio ten natureza administrativa e as discrepancias que xurdan pola súa aplicación serán resoltas, previo informe ou proposta da comisión de seguimento, pola Vicepresidencia primeira e Consellaría de Presidencia Xustiza e Turismo, quedando as partes suxeitas á xurisdición contencioso - administrativa para a resolución de calquera conflito que puidese xurdir na súa aplicación.

En todo o non previsto expresamente neste convenio estarase ao disposto na Lei 9/2007, do 13 de xuño, de subvencións de Galicia e no Decreto 11/2009 do 8 de xaneiro, polo que se aproba o Regulamento da Lei 9/2007, de 13 de xuño de subvencións de Galicia.

E en proba de conformidade co expresado neste convenio, asíñase polas partes comparecentes, na data consignada na sinatura electrónica.

O vicepresidente primeiro e conselleiro de
Presidencia, Xustiza e Turismo

O presidente da Confederación Galega
de Persoas con Discapacidade

Alfonso Rueda Valenzuela

Anxo Antón Queiruga Vila

